

**Date – 21/07/2024**

**Time - 18:30 -18:40Hrs**

## **REGIONAL NEWS BULLETIN**

### **HEADLINES (EVENING)**

1. Gauhati High Court chuan Mizoram kaltlanga dan kalha kuhva ro sumdawwna chungchang chhui hna chu CBI kutah a dah.
2. Tunlai hian Champhai district chhim lam khaw 10 chuanga pangang puangin lo neitute a timangang hle.
3. Naktukah Parliament Budget Session tan a ni dawn.
4. Kerala-ah Nipah virus vanga rawlthar pakhat a thih hnuah sorkar laipui chuan hri darh thei khuahkhirh tura ruahmanna tha tak siam turin Kerala sorkar a hriattir.

<><><>

### **HC FOR CBI PROBE**

Gauhati High Court chuan Champhai district kal tlanga dan kalha kuhva ro tawlh thin ni a sawi chu chhui turin Central Bureau of Investigation (CBI) a hriattir.

Justice Pu Michael Zothankhuma leh Justice Pi Marly Vankung thutna bench chuan tunhnai kha he thupek hi tichhuakin kuhva ro hmanga sumdawwna chungchang hi chhui turin CBI a hriattir a. Hei hi khawtlang tana thawktu 'Ruafela Nu' ti a hriattir, Pi Vanramchhuangi'n Gauhati High Court-a public interest litigation (PIL) a thehluh chungchanga thutlukna a siam a ni a. Court chuan Myanmar atanga Champhai district kal tlanga kuhva

ro tawlh a nih thu leh ramdang thil a ni chung a e-way bill leh GST certificate hmanga phurh tlang thin ni a puhna chu a ngai thutak a. Tun hnai mai-ah pawh hetiang a kuhva ro phurh hi thuneitute'n an man thu a tarlang a. Pi Vanramchhuangin' a PIL-a a hnuh luha a khin hrang hrangte chuan he thil inpuhmawhna hi CBI-in chhui se tih hi an hnial lo vek niin court chuan a tarlang a. A bik takin Mizoram Police-te chuan ramdang atanga dan kalha bungraw lakluh hi chhui hi an hna a nih loh thu an sawi a. Sumdawnna kawnga dan bawhchhiatna thil a nih avangin tan bik nei lovin CBI-in chhui se a tha bera an rin thu an sawi a ni tiin High Court bench chuan a thupekah a tarlang a ni.

Ram dang atanga kuhva ro lakluh leh sumdawnna atana hman chungchang hi Mizorama sawi hlawh ber zing ami a ni a. Mi lian leh thiltithe i tak takte an inrawlh ni a puhna a awm avangin Police pawhin hemi thil hi an chhui hreh niin a lang a. Hei bakah hian political party-te an inpuhmawh nasa hle baw k a ni. Court chuan tuna sorkarin phalna pek chawp ngai lova CBI-in chhui tul apiang chhui tura nikum December ni 28-a thuneihna a lo pek tawh tlawhchhanin he thil chhui hna hi CBI kuta hlan ta a nih thu a tarlang tel baw k a ni.



## **EMBARGO**

Central Young Lai Association (CYLA) chuan kar hmasa tawp lam khan Myanmar a nitin mamawh dang phurhluh khap chu an hlip a, petrol, diesel leh leitha thawn luh erawh chu an la dang zui zel.

CYLA hian tun hnai a Lawngtlai district magistrate-in man tova petrol leh diesel hralh bakah Myanmar a thawnluh a khap chu lawmawm an tih thu an sawi a. Hemi hnu hian mipui nitin mamawh bungraw dangte Myanmar ram chhunga thawnluh khapna chu Ningani zan khan a thlah dul ta a ni. Lawngtlai atanga bungraw phurhchhuahte hi Hruitezawl leh Zochachhuah panpui an ni a, Hruitezawl atang hian Chhimtuipui lui-ah Lawng hmangin Myanmar ramah phurhluh niin, Zochachhuah thlen hma, Zocha Lei (bridge) bul atangin Lawng hmang baw k in Myanmar ah phurhluh a ni. Lawngtlai District-ah raltlan ni lo, ramdangmi ten bu an khuar loh na'n YLA chuan hma a la chhunzawm zel a,

Branch YLA te chuan an huamchhungah inkaihhraina siamin hma an la mek a ni.



### **METH SEIZURE**

Assam Rifles leh Special Narcotics, CID (Crime) Aizawl tangrualte chuan nimin khan Thuampui venga Ch. Chhunga Bus Terminal-ah Crystal Meth kg 1 an man.

Assam Rifles thuchhuahin a tarlan danin Crystal meth an man rual hian lirthei pakhat an endiknaah ruihhlo neitu a puh a hming tarlan loh Bawngkawn Shalom veng ami an man a. An ruihhlo man hi cheng vaibelchhe 3 hu ni-in thuchhuah chuan a sawi a. An ruihhlo man leh an mi rinhlelh man hi Special Narcotics, CID (Crime), Aizawl kutah turin an hlan nghal a ni.



### **PEST OUTBREAK**


Tunlai hian Champhai district chhim lam, East Tuipui assembly bial chhunga khaw engemaw zat a tlangram loneitute chu pangang puangin a timangang hle.

Agriculture and Farmers' Welfare department hotute hnen atanga thu dawn danin pangang puan tanna hi a la rei lo na-in khaw 10 chuangte thlawhhma a suasam mek a. He pangang puang hi kum hmasa lama puang thin vaimim hnah leh kung eichhetu Fall Army Worm kha ni lovin 'hnah khawr pangang' an tih mai, sap tawnga 'leaf folder' an tih chi a ni a. Buh hnahah bei-in buh hnah a khawr a, buh hnah leh a kung a tichhe thei a ni. Agriculture department hotute chuan rannung thahna hlo a theih ang anga sem a nih thu leh a hman dan pawh loneitute zirtir an nih thu an sawi a. Hetih lai hian Vaphai khawtlang hruaitu pakhat chuan Champhai District Agriculture Officer pisa lamin an hman duh khawp rannung thahna hlo pek tur an neih loh thu leh a leina tur sum ruahman an neih loh bawk thu an sawi tih Akashvani Aizawl a hrilh a. An rannung thahna hlo sem thenkhat chu kum 2015 a thi (expire) tawhte a nih thu a sawi. Rannung thahna hlo tha a awm loh avangin kah rem a huphurhawm a, buh hnah an

khawr tlat avangin a pangang va kahfuh kha a harsa a ni a ti. Pangang puang hian an buh thar tur nasa taka a tihlem phah an hlauh thu an sawi bawk a ni.

Khi lai biala leilet neitute chuan buh an phun chhoh mek thu leh pangang puangin a la tihbuai ve loh thu an sawi a. Tlangram loneitute erawhin an buaipui hle thu an sawi. Pangang puanna khuate hi hriat theih chinah Farkawn, Vaphai, Vangchhia leh a chhehvel khaw engemaw zat a ni a. Chawlhkar khat kalta a Champhai DAO an sawn tak chuan a awm lai khan khaw 6-ah a puang a, tunah chuan khaw hrang hranga a darh viau tawh a rin thu a sawi a. Tarlan tak khaw chheh velte hi biak pawh hleih theih an ni lo a ni.

Mizote hi a hnam puma lo neih leh thlawhhma laka eizawng thin an nih avangin tunhma atang tawhin an dam-khaw-chhuahna atana an lo neih kaihnawih thil chik taka lo zir tawh thinte chuan pangang puang ang chi hi thlawhhma tichhe thei leh tam thlen theitu-ah an pawm a. Nakum a 'Thingtam' lo thleng tur hriattir lawkna-ah an ngai a ni. Mautam leh Thingtam apiangin sazu puangin an buh-leh-bal nasa taka tichhia-in tampui mitthi a thlen tawh thin a. Hetiang chhiatna a lo thlen hma hian pangang, thangnang leh khau puang a awm thin niin an sawi a. Kum 1977 kha Thingtam hnuhnung ber a ni a, khata tanga kum 48-na nakum khian a thleng leh ngei dawna chhut a ni a, hmun tam takah rawthing hi a tam tan chho mek ni a sawi a ni bawk.



## ASF UPDATE

Vawiin khan African Swine Fever (ASF) hri kai vawk 142 chu Mizoram district 4-ah an thi leh a, hemi tiam hian kumina ASF avanga vawk thi zat chu 6,791 a tling ta.

Vawiina vawk thihna district-te hi Aizawl, Serchhip, Hnahthial leh Lunglei te a ni a. A khaw mala vawk thi tamna ber chu Serchhip district a Khawlailung a ni a, 46 an thi a, Aizawl district-a Sateek khua-ah 39 thi-in a khaw thenbawm Aibawk khua-ah 24 a thi a ni. Nikum tawp lama ASF vawk pulhri leng reh tawha ngaih kha kumin kum bulah leng lehin February ni 9 khan

Champhai district-a Leithum khua-ah he vawk pulhri kai hi hmuhchhuah leh a ni a. Tun dinhmunah hian veng leh khaw 183 chu ASF vawk pulhri lenna-ah animal husbandry and veterinary department chuan an puang a ni.

Hetih lai hian vawiin vek khan vawk pulhri darh venna atan vawk 153 suat/talh a ni a. Heti hian kumina ASF vawk pulhri len tan leh atanga tun thlenga vawk suat zat chu 12,808 a tling tawh a. Vawiinah hian Khawlailung khuaah ringawt 59 an tihlum a, Hnahthial khua-ah 39 leh Keitum khua-ah 18 an tihlum bawk a ni.



## COPTER SERVICE

Zirtawpni chawhnu dar 1 leh a chanve khan Manipur a Churachandpur atangin Aizawl Mualpui helipad-ah helicopter a lo tum a, Churachandpur leh Aizawl inkara helicopter thlawk thin chu chhonzawm a ni leh ta a ni.

Mualpui a helicopter lo tumah hian Churachandpur atangin mi 11 an rawn chuang a, Mualpui atanga Churachandpur lama thlawkah hian mi 9 an chuang thung niin Civil Aviation hotute chuan Akashvani an hrilh. Churachandpur leh Aizawl inkara helicopter thlawk hi kartin Thawhtanni leh Zirtawpni a thlawk tura ruahman a ni a. Kar hmasa Thawhtanni kha a thlawh tan tura ruahman a nih lai-in Manipur Transport lamin Pathianni a an rawn hriattir chauh a nih avangin an inbuatsaih hman lova, ticket pawh an hralh chhuak hman lo niin civil aviation a thawkte chuan an sawi a. Zirtawpni khan a hmasa ber chu a thlawk ta chauh a ni. Mualpui atanga Churachandpur pan helicopter hi thlawk tlang lovin Lengpui tumhmunah a tui (fuel) a thun kual ziah thin dawn niin an sawi a, a chuan man pawh Churachandpur leh Aizawl inkar ai chuan a to hret a ni.

Churachandpur leh Aizawl inkara helicopter service hi Ministry of Home Affairs remtihna-in nikum September ni 27 atang khan chawlhkar khatah vawi 1 a thlawk tan a. Kumin June ni 27 khan tihtawp lailawk niin, tunah hian chhonzawm a ni leh ta a. Manipur a chi leh chi intihbuaina avanga hliamte leh damlo dang state danga enkawl ngaite tan helicopter service hi a tangkai hle a. Tlangmite tan Imphal atanga thlawk tura Manipur phaizawl china luh ngam a nih loh avangin Aizawl a helicopter hmanga kal

hi a awlsam hle. Kawnga lirthei a kal chuan kim 330 chuang a ni a, tunlai furah pheih chuan darkar 15 chuangte an thang thin ni a sawi a ni.



#### **ALL PARTY MEETING**

Parliament Budget Session chu naktukah tan a ni dawn a, vawiin khan sorkarin party hrang hrang thutkhawm, New Delhi-ah kovin parliament in hnih inkhawm, tluang taka neih anih theih nan party hrang hrangte thawhpuih a sawm a ni.

He thutkhawmah hian midang bakah Union Minister Rajnath Singh, Kiren Rijiju, Arjun Ram Meghwal, JP Nadda, Chirag Paswan, leh Ramdas Athawale, Congress hruaitu Jairam Ramesh-a leh Gaurav Gogoi, NCP hruaitu Praful Patel, DMK hruaitu TR Baalu leh Tiruchi Siva, Aam Aadmi Party hruaitu Sanjay Singh-a leh AIMIM MP Asaduddin Owaisi-a te an tel a ni.



#### **NIPAH VIRUS**

Kerala Malappuram dist-ah Nipah virus vangin vawiin khan rawlthar kum 14 mi a thi a, hri a kai atanga amah hnaihtu mi 246 vel chhui chhuah an ni tawh a, an zinga mi 63 chu Nipah hri kai ve thei dinhmunah an ding mek a ni.

Sorkar laipui chuan Nipah hri darh thei khuahkhirhna tur ruahmanna tha tak siam turin Kerala sorkar a hriattir a, hri darh dan chhui hna thawhpui turin Union Health Ministry hnuai National One Health Mission atangin mithiam rual awmna team tirh tum a ni. Health Ministry chuan Kerala-ah hian kum kalta khan Kozhikode Dist-ah Nipah Virus hmuh a lo nih thu a sawi a, thei rah tlan thin Bakte chu he natna hrik paitu an nih ber thu sawiin Nipah hrik pai bak rah tlan, mihringin an ei chuan he natna hi an kai chhawng thei a ni, a ti a, Kerala sorkar chu ni 12 kalta chhunga hri kai hnim hnai tute zawng chhuaka khung hrang turin a hriattir a ni.

